

國史列傳

滿漢大臣列傳

卷四十九

華聘

達勒精阿

全保

喜明

瑚素通阿

華聘墨爾丹氏正黃旗滿洲人世居黑龍江之布特哈乾隆五十年住京充護軍五十二年派往臺灣軍營于斗六門等處打仗奮勇授藍翎侍衛五十五年擢三等侍衛嘉慶元年隨四川總督和琳平黔楚苗匪克復乾州進攻賊首石柳鄧于平隴以功陞三等侍衛三年由湖南赴達州隨四川總督勒保勦辦教匪白號首逆王三槐就縛經勒保以在事出力員弁奏請

加恩得

旨華聘著授頭等侍衛五年青號賊首徐添德冉添元等股匪自定遠偷渡嘉陵江涪江而上蔓及川西二月參贊德楞泰由秦赴蜀派令華聘等分路勦賊于新店子斃賊三百餘名三月由海塘鋪進攻火石埡會合官兵連日鏖戰生擒冉添元復于劍州李家坪分路進勦白號張子聰等股匪大加殲戮賊匪竄

逸七月黃號賊首樊人傑走鄰水白號賊首苟文明鮮大川張金連等向江北潛行官兵分路兜圍勒保督同華聘等由草街子元口鎮沿江抄截敗賊于小來溪白沙場追至岳池之新場地方斃賊多名華聘復偕總兵薛大烈捕賊于飛龍場追躡七十餘里至余家場盡殲之八月勦白號賊首劉朝選湯思蛟二逆于下八廟華聘偕薛大烈等爲一路由山梁下壓直至茅坪賊向王家埧潛逃華聘率馬兵迎截斃多名九月劉朝選張金連又分兩路約于蒲家埧會齊仍回太平華聘偕薛大烈等緊躡至蒲家壩擊斃八十餘名生擒瞿全玉等一百三十名追至楊子嶺會總兵永寧等兵面回來攻又敗之十月賊首張金連及線號餘匪由楚竄川闌入開縣華聘偕薛大烈等由大灘口抄出賊前至漢陽河鎗斃執旗賊目及馬步十餘餘匪竄逸追殺四十餘里俘斬多名經德楞泰勒保奏入得

旨頭等侍衛華聘著賞給多克希特巴圖魯名號仍照例賞銀一百兩十一月襄陽白號楊開第李炳等五股賊匪合夥由寧羌廣元向巴州東竄至佛樓寺德楞泰督同華聘等直趨佛樓

寺大路遇賊探八十騎盡殲之六年四月賊首湯思蛟等在馬家營一帶屯踞勒保督同華聘等由溫湯井榨井填一路兜截五月華聘等由大寧鹽場迎擊追至香沖六月青藍兩號餘匪竄東鄉犯仁和永興二寨我兵次樊噲店勒保令華聘等從中路進勦斃賊多名十二月青號賊首楊掌櫃帶領殘匪向墊江梁山奔竄勒保令華聘等分投搜捕斃賊五六十名擒獲男婦百七十四名七年正月追及于渠縣二郎橋殲斃楊掌櫃僞先鋒王青及餘匪五十二名賊向水嶺奔竄勒保督同華聘等就近搜捕梁山境內芝蔴坪另股零匪破賊于關口山追至達州風洞子悉數殲除二月勦白號餘賊宋國品于梁山柏林漕適青號餘匪陳自得從奉節雲陽窮竄勒保令華聘等向萬縣迎擊追至宗州九亭地方斃賊三十餘名擒獲數十名賊遁我兵跟蹤緊躡賊復入鄰水之桂林漕華聘等乘夜抄擊斃賊五六十名擒獲十三名八年八月川省餘匪肅清勒保奏令華聘等管領吉林索倫馬隊官兵凱撤回京十一年八月

上巡幸木蘭

賞穿黃馬褂

命在乾清門行走兼調習

御用馬匹十二年授公中佐領十四年授

御前侍衛十二月授鑲紅旗蒙古副都統十六年察哈爾都統興肇參奏此次伊犁將軍貢馬共帶有百五十八匹沿途多索支應詢進馬總管佐領等稱係分送王大臣及華聘阿那保各得有餽送馬匹

諭曰御前侍衛多人何以華聘阿那保二人獨有餽送明係二人爲派出試馬匹之人是以該將軍進馬恐其挑剔先致送以杜其口此等風氣亟應飭禁嗣後伊犁將軍每年進馬除例貢五匹外再備進五匹此外不許多帶一匹十七年十二月

諭曰華聘病久不能在御前侍衛上行走著即離御前侍衛副都統任賞給副都統銜兼頭等侍衛病愈在大門上行走逾一二年身體健壯再酌賞差使十八年十一月

命原品休致回原籍調理二十年八月卒經黑龍江將軍特依順保奏

聞

諭曰華聘前在軍營奮勇曾賞給巴圖魯名號在乾清門行走有年調習御馬甚屬出力前年因病不能當差降旨施恩令其以副都統職銜攜眷回籍調理並諭黑龍江將軍等如伊病愈仍奏賞差使今聞溘逝殊堪軫恤應得恩賞該部照副都統例察覈具奏仍由該處庫內動用銀百兩賞伊家屬飭領以示矜恤子圖爾古仲現任驍騎校

達勒精阿鈕祜祿氏正白旗滿洲人由親軍于乾隆五十一年授藍翎侍衛五十五年遷三等侍衛五十七年隨將軍福康安征廓爾喀有功

賞給喀勒崇依巴圖魯名號六十年隨雲貴總督福康安勦貴州正大營一帶苗匪殲斃多名嗣因湖南逆苗石三保等圍永綏日久偕總兵花連布等繞道往援解其圍奉

旨嘉獎

賞給荷包四月賊匪恃蘭草坪險峻聚衆負嵎達勒精阿由對面竹子山進攻痛勦之奉

旨加陞一等嘉慶二年川省教匪冉文儔等屯聚王家寨達勒精阿隨總統宜綿攻奪碉寨奮勉先登得

旨擢頭等侍衛十一月首逆姚之富等逼入漢中連營二十餘里達勒精阿隨內大臣德楞泰由南岸沿江一路進剿三年正月賊匪遁匿廟了子左右兩山林達勒精阿引兵由山後抄擊之殺斃甚衆十月冉文儔徐添德等在箕山附近屯聚借羅其清爲聲援達勒精阿由馬鞍山郭家山冉家澗往來截殺十一月敗羅其清于官山四年正月進逼冉文儔于蔴壩寨分兵三路達勒精阿隨德楞泰扼其東賊乘夜撲我兵鎗努齊發殲斃多名七月線號賊匪竄至竹谿之大禾田達勒精阿隨德楞泰由老木孔小道繞出衝擊之生擒首逆龔文玉八月擊賊于風玉坪勝之九月由順河前進截擊大股賊匪十月傳教首逆劉學仁向羅家壩奔逸達勒精阿由紗帽寨七盤子直趨大壩關兜剿五年三月賊衆于火石壩山後斬殺多名三月白號賊匪張子聰等屯蓬溪縣之新店子而分股在附近十數里之成谷太和仁和仁義四寨圍攻甚急達勒精阿偕副將窩星額由觀

音岩田壩子馳救奮力勦殺殲賊百餘名圍立解救出良民一萬數千經德楞泰奏入得

旨優敘閏四月白號股匪劉朝選等向西北折竄將入鄰水界內其時夜雨如注達勒精阿伏兵兩山間觀賊度溝上山突出兵擊之賊大潰乘雨緊追又敗之于秦家場復有張子聰度向瑤股匪竄向忠州之禹蹟灘達勒精阿由九亭場進擊敗之五月搗賊巢于長池壩六月攻竄匪于汪家坪九月大兵追勦劉朝選湯思蛟諸賊于石虎嶺深山密箐賊衆藏匿我軍四面圍之賊夜于大壩口衝撲三次均經帶兵擊退十一月賊向儀隴觀音河遁逸達勒精阿由犁山場迎勦橫截賊隊其一股竄入山下深溝達勒精阿帶兵直入生擒楊昌等數十名六年正月由山陽之五里鋪大破高二股匪于乾溝卽分兵冒雪乘夜抄至野豬坪連勝之屢奉

旨交部議敘二月逆匪龍紹周東竄德楞泰令達勒精阿由掃箕寨山右進兵追殺二十餘里時大軍進擊二郎壩及馬鞍山鹽池子達勒精阿赴六桿溪及大士菴張家壩往來策應屢勝

之四月青號賊匪徐添德遁至紅花梁我軍張兩翼而進達勒精阿居中衝殺餘匪西竄直搗黃石板賊巢追殺百六十七里斬獲甚多八月龍紹周等走巫山巴東之冉村板倉坪一帶達勒精阿馳赴陰條嶺堵勦卽進至黃白崖克之遂由衆保坪老林東北探蹤迎擊九月賊竄竹谿屬之五里堖達勒精阿由右面之九道梁遏其入湖北腹地時龍逆由盤龍山之兵家坪向西奔逃官兵冒雪窮追達勒精阿偕總督蘇清阿等分路直衝賊巢殺賊百餘生擒八十餘名龍逆殲斃奏入敍功

賞給副都統銜尋補鑲紅旗蒙古副都統十月德楞泰勦辦湯劉二逆股匪令達勒精阿由榨井壩渡口巖一帶探勦十一月白號賊匪張添倫等有窺伺嘉陵江之勢達勒精阿復由柳溪溝疾追至騾子槽等處盡力衝入因山高陡險冰雪溜滑人馬墜下坎者數十壓傷左膝忍痛易馬帶兵追賊

上念其曾否就愈

特垂詢焉十二月首逆苟文明由開縣之雙河口竄至黃柏岩貝母池老山達勒精阿帶兵邀其東以截入楚之路七年正月

白號逆匪張姓由火峰界嶺折回巴東而黃白藍號餘匪亦由巫山竄入火峰界嶺達勒精阿分兵趨三匯鋪追至馬埡口山梁大軍連日緊追達勒精阿隨後策應首尾併擊大破賊于張家村二月餘匪竄至水口復馳擊之進至公坪東洋子龍洞王家梁朱家三壩所向皆捷線號及白號餘匪竄雲奉交界之鳳凰嶺大山達勒精阿由山脚仰攻賊憑高用滾石下壓我兵急擊之乘勝追至紫峽河殲擒無算三月敗白號股匪于南埡場又敗張長青于夔州大昌生擒長青妻李氏又追勦于大寧通城四月賊分股向奉節雲陽奔竄達勒精阿馳赴勦辦所在有功五月白號首逆熊劉賊股竄入川境達勒精阿于巫山邊界督兵馳勦擒斬二百餘名奪獲軍械馬騾甚多經獲犯認出僞元帥劉朝選首級

上以節屆端陽

賞給達勒精阿扇套香囊仍

諭部議敘并奉

命搜捕零匪緊顧川楚邊境嗣因四川總督勒保查驗劉朝選

首級係青號僞元帥劉姓並非白號首逆

諭曰達勒精阿不必給與議敘亦不必究其稟報不確之咎時有股匪由巫山之犄牛窖竄至達勒精阿就近迎擊追勦于隻保山樟木壩陳家坡轉戰而前直入楚境四五十里焚斃五十餘人殲斃三百餘名生擒黃號僞總兵張大向六月楚省黃號餘匪竄入大寧達勒精阿帶兵馳抵黃連坪三溪子躡勦又迎擊之于彎腰樹復堵擊之于徐家壩七月訊知蒲添寶大夥在犁子坪卽帶兵馳往賊選戰手三百餘人抵拒達勒精阿由左抄擊令副將鄭起賢等分兵追勦賊敗竄野貓岩憑高壓下達勒精阿率兵競進克之斬僞元帥楊有貴時蒲添寶圖竄陰條達勒精阿取道張公橋向前兜勦賊走羊板出天池壩達勒精阿乘夜發兵時大雨如注風霧交加賊分股而來我兵分路迎擊達勒精阿由左路橫截其隊賊勢散而復聚忽有賊匪由老林突出隨帶兵勇奮力督戰賊仍遁入老林復由右路繞上山梁我兵愈戰愈力追至竹谿之滾子坪賊于岩坎上恃險抵禦我兵分中左右三路奮勦飛礮轟擊賊不能敵遂乘勝搶占山

梁殲獲多名八月賊由雲霧溪竄屯中蓬子達勒精阿偕副都統色爾滾等直搗之追至蔡家壩賊遁泉溪霧雨中盡力窮追兩日夜走三百餘里連夜露宿疊敗之于百人溝瓦屋溝等處擒斬一千有餘蒲添寶墜殪山岩奏入

諭曰達勒精阿奮勇可嘉着在乾清門行走仍交部議敘並賞給玉搬指一個大荷包一對小荷包四個尋奉

命帶兵回川復由徐家壩至蕭家壩堵截零匪九月督兵防護大寧邊界十月調往梁萬等處勦辦線號黃號餘匪

命與提督穆克登布前後夾擊賊聞大兵至卽據雙鳳山恃險抗拒達勒精阿直進衝擊殲獲甚衆賊向通巴一帶逃匿又追敗之于大溝壩賊向平官壩竄走

上以達勒精阿帶兵迎勦不能迅速殲除該匪復竄近陝界實屬不力傳旨申飭尋追賊于鐵匠埡穿孔岩乘夜掩擊又敗之于刁林溝十一月擊賊于紅花山又與穆克登布等緊躡至鐵燈臺夾擊之大獲勝仗

上嘉之賊分東西南三路逃遁達勒精阿督兵自西路勦之追

擊齊國典分股賊匪于印山坪卽由岩家壩烏林埡大河口竭力赴勦至通江蒲家灣與副將羅聲臯兩面夾擊斬殺殆盡十二月至南江陳家坪搜獲餘匪八年正月至魚尖壩搜捕逃匪大功告竣達勒精阿帶領盛京官兵凱旋九月授公中佐領十年五月

命在御前侍衛上行走七月劉新莊行宮有武備院披甲人德克精額撞入黃城值達勒精阿坐班未經查出奉

旨罰俸一年九月授鑲藍旗護軍統領十二年三月兼上駟院卿十四年卒

諭曰達勒精阿在御前乾清門行走多年且在軍營甚屬出力亦曾受傷今聞病故殊覺可惜

命照都統例

賜卹

全保杭阿坦氏鑲黃旗蒙古人由生員考補理藩院筆帖式乾隆五十一年遷主事補軍機章京五十四年遷員外郎是年實授直隸口北道五十五年調熱河道五十九年七月

賞戴花翎六十年署直隸按察使嘉慶四年遷山東布政使疏
劾德平縣知縣葉芳浮收漕糧釀成重案請

旨革職并自請議處得

旨交部議處部議降二級抵銷十一月護理東河河道總督五
年正月疏劾賁緣餽送之知縣郭元兆

上嘉之褫元兆職四月因餽送泰山進香侍衛明安土物銀兩
奉

旨罰令捐資修理泰山廟宇五月護理山東巡撫六年四月授
湖北巡撫時川楚賊匪未清全保馳抵襄陽以各股竄匪情形
及竹山竹谿兩縣防堵事宜奏入

上命長齡將總督印務暫交全保接管五月同提督長齡總兵
明亮堵勦冉學勝股匪分路殲擒五百餘人箭斃僞元帥劉作
初

上嘉其功是月奏川匪湯思蛟劉朝選竄近上龕關至馬鹿池
三道溝等處

諭曰楚境房竹一帶前經全保等分股防堵何以此時又有川

省賊匪竄近上龕至馬鹿池等處可見前奏不實著全保等將一切大概情形查明速奏尋偕湖廣總督吳熊光長齡明亮分勦湯劉等匪于青峯溝殲擒甚衆復督兵在獅子崖等處防堵截賊北竄之路並恐賊匪折出均州穀城自東北向西南遏擊奏入

上是之六月川匪湯思蛟劉朝選併合白號黃號股匪入楚經官兵由青峯溝范家垭等處截其東趨全保于獅子崖上龕堵勦長齡督同總兵孫清元等分路進擊斬獲多名

諭曰此次湯劉等逆併夥入楚勢欲東趨經長齡率同孫清元等取道追勦該匪不敢折回南向興山邊界逃遁全保長齡等仍須督飭官兵乘勝勦殺毋使一名東竄尋飭將弁從楚至平地河迎擊彎腰樹賊匪分翼兜勦侍衛塔津保參將烏爾卿額等率兵鼓勇競進殺賊一百餘名生擒僞先鋒

諭曰全保雖未親身打仗但一切調劑工支糧運經理妥協著先賞給搬指鼻烟壺大小荷包俟楚境賊匪全行勦淨再加懋賞七月湯劉二逆會合辛聰及黃號白號股匪入楚全保督兵

由仙家坪一路進擊鎗斃賊探十一名餘匪折回分股逃散全保偕長齡帶兵于仙家坪上龕遏住竄路七月探知黃號龍紹周分股賊匪折竄向楚界即率兵勇由上龕至鐘鼓山公主河等處奮力截擊箭斃僞元帥李大年生擒僞總兵蔣添授等三名殲擒賊匪七百餘名時王山李明各股匪竄楚省沿邊老林窺伺繞近竹谿房縣一帶全保偕長齡等率鎮將分股兜勦殲擒九百餘名匪衆仍向平利大寧逸去八月全保由吉陽關督兵抄進探知賊衆屯聚黨家溝派官兵三面設伏連夜進勦賊俱散處民人空房草棚兵勇拋擲火彈圍殺草棚延燒賊冒死衝出伏兵四起鎗箭並發斃賊甚多均奏入屢奉

優旨獎勵九月戴家營股匪在長峪河一帶奔竄全保派侍衛富翰塔津保等分路扼勦親率參將孫應奉等馳赴長峪河遇賊衝出迎頭截殺追擊二十餘里殲賊六百生擒僞元帥張起倫僞先鋒張世才彭朝良奏入

賞白玉搬指玻璃盒大小荷包十月偕長齡奏楚境賊匪惟曾芝秀及戴家營兩股兇悍詭譎人數亦衆臣等熟計自應先其

所急併力逼擊再將各路零匪及分隊落後之賊逐段搜捕尋于漳洛河扁擔溝連湖坪等處節次殲擒奏入

諭曰此次全保長齡分路帶兵勦曾芝秀戴家營兩股賊匪節次斬獲不過百餘人及數十人不等仍未能將曾戴兩股首逆殲擒夥匪勦淨所辦殊未愜意因吳熊光全保長齡俱曾在軍機處行走于

皇考籌辦軍務機宜及朕旨示方略自所素悉是以將伊二人先後簡授該省督撫提督冀其併力同心認真勦辦況曾芝秀戴家營兩股均係小股零匪楚省現有兵力不爲不厚何難悉數殄平若吳熊光等尙不速行剴盡楚省必待經略參贊辦竣川賊到楚勦辦伊等有何面目耶所有曾戴兩股殘敗餘匪著責成伊三人務在楚境辦竣不得任其他竄十一月戴家營股匪竄往白河口合川省邊界青藍等號賊衆驟至二千餘人向老居溝一帶奔竄全保率兵分股抄擊斃賊三百餘得

旨交部議敘並賞四喜玉搬指大小荷包十二月偕吳熊光長齡奏勦戴家營藍黃青白各號賊匪于譚家壩蔡家坪諸處殲